

OPUSCULA MULTIFORMIA

VNO VOLVGINE COLLECTA

QVAE SINT POSTREMA PAGINULA DOCEBIT.



*Parvum parva decent : non omnia
possumus omnes .*



ROMAE MDCCCXXX.

EX TYPOGRAPHIA PEREGO-SALVIONIANA

PERMISSV PRAESIDVM.

IOSEPHO BARALDIO

ARCHIPRESBYTERO ECCLESIAE CATHEDRALIS MVTINENSIS

DOCTORI DECVRIALI PHILOSOPHIAE MORALIS

MODERATORI EPHEMERIDOS

DE RELIGIONE RE LITTERARIA ETC.

DOMINICVS ANTONIVS MARSELLA

S. P. D.

*A*etas jam ingravescens, multoque etiam magis caecus, molestusque, quo ab hinc plures annos non leviter excrucior morbus, cum nequaquam sinant amplius ad politioris humanitatis studia, quibus vel maxime delectabar, incumbere, ut aliquid solatii quaererem, et simul otium, taediumque, quantum quidem fieri posset, amoverem, nonnulla parva opuscula, eaque multiformia dudum elaborata, numquam tamen, ut oportebat, dolata, raptim colligenda, typisque evulganda curavi. Quid tum inde? vix prelo commissis, cum facti me valde poenituit, quod veritus, ne re tam propere, nec satis considerate confecta, plura fortasse irrepsissent, quae non demissa solum per aures, sed oculis etiam subjecta fidelibus, acriter improbanda, non modo risu excipienda viderentur. Cum vero jacta jam esset alea, id mihi consilii reliquum esse intellexi, ut ea, quantulacumque essent, tibi inscriberem, atque attente expendenda committerem. Ita enim de

*eadem, ut ajunt, fœdela duos dealbare posse parietes visum, ut et aliquam, quamvis tenuem, mei in te officii, ac benevolentiae significationem, uti percipiebam, palam exhiberem, et in gravissimo tuo judicio plane acquiescens, omni liberarer metu, si nihil, inscitiae vero, aut imprudentiae me ipsum ingenuè arguerem, si quid peccasse deprehenderis, rescripseris. Equidem novi quam occupata tua sint tempora vel in animarum salute procuranda, vel in operibus elucubrandis, in quibus non tam facile internoscitur, utrum rerum gravitas, an sermonis venustas, perspicuitas, verborumque volubilitas magis eluceant, vel in aliis rite obeundis muneribus, quae non parvo religioni, ac litterariae reipublicae ornamento sunt, et usui. Sed si quid subsecivi temporis aliquando nactus, pro officiosa, quae tibi mecum familiaritate, ne grave-
ris, rogo, ea patienter pervolutare, ita tamen, ut amici prorsus exuens, Aristarchi vero personam induens, quid ipse sentias, libere, aperteque significare non dubites. Neque aliud hic dicam, neque quidquam vel cursim attingam, quo perspectam, exploratamque modestiam tuam vel minimum videar offendere. Hoc addam unum, quod persuasissimum habeas velim, me quidquid valeam, valeo certe quidem parum, vel potius nihil, id omne valere tibi, cum in eorum numero me esse ex animo profiteor, qui tibi dicatissimi.*

Romae XIV. KAL. Apriles AN. MDCCCXXX.

DE B. MARIA VIRGINE IN CAELVM ERECTA

O R A T I O

HABITA AD PIVM VII. PONT. MAX.

*In Sacello Burghesiano Basilicae Liberianae
in Exquiliis*

XVIII. KAL. SEPTEMBR. AN. MDCCCI.



Quod erat optandum maxime, BEATISSIME PATER, et quod unum ad MARIAE VIRGINIS honorem, et gloriam plene, cumulateque amplificandam maxime pertinere videbatur; id divino prorsus consilio perfectum solemniter hoc die, uti ab vetustissimis temporibus traditum accepimus, festo ritu recolimus. Quo enim haec tanta celebritas? quo anniversaria haec sacra? quo denique amplissimus hic terrarum orbis consessus, nisi ut quam sane singularibus a Deo beneficiis cumulatam, summis honoribus auctam in terris perspeximus, eandem nunc in caelum erectam votis omnibus, ac laudibus prosequamur?

Quod quidem ei merito, atque optimo jure contigisse fatendum est. Haec enim ea, quae ab aeterno ordinata, ac primaevae labis omnino nescia, tota pulchra ex ore Altissimi prodivit, ut quasi aurora consurgens, justitiae Solem jam jam oriturum portenderet, qui offusas mortalibus tenebras discu-

teret . Haec , quam nuntius de caelo missus , et gratiâ plenam , et benedictam inter mulieres salutavit , et cujus ex ore , nutuque Deus ipse in homine redimendo veluti pendere visus est . Haec , quae plena Deo , ac divino secunda Spiritu , arca foederis , tabernaculum Dei cum hominibus , sacrarium omnis divinitatis , caelestis sponsa aequae , ac mater constituta . Haec demum ea , quae sine ullâ integerrimae virginittis jacturâ illum nobis praebuit , qui tametsi splendor sit gloriae , et figura substantiae Patris , factus est ex muliere , ut universum humanum genus ab daemonis captivitate , in quam primi parentis culpâ misere fuerat conjectum , redimeret , vindicaret .

At quae tamen una longe ante alias tantam invenit gratiam apud Dominum , ut iis honoris , ac dignitatis ornamentis plenâ manu cumulata , quae nemo unus ex mortalibus non dicam exoptare , sed ne cogitare quidem umquam potuisset , nihil certe aliud semper spectandum , nihil conandum curavit , nisi ut qualem se jam antea caelesti nuntio fuerat professa , talem etiam se Domini ancillam perpetuâ vitâ praestaret , et quae certe Deo maxima mulierum , eadem vel minima hominibus videretur . Quamquam enim regio Davidicae stirpis sanguine orta , quae Judae sceptrum tamdiu obtinuerat , ceteris tamen Israëlitis matribus permixta ne minimam quidem umquam avitae vel dignitatis , vel auctoritatis speciem prae se ferre visa fuit . Ita cum Fi-

lius in similitudinem hominum factus, et habitu inventus ut homo, tum verò ecquis, nisi aliunde nosset, eam Dei etiam, uti erat, non hominis tantum matrem et habuisset, et praedicasset? Quod si vel obscuram, vulgaremque vitae rationem, quo maxima quaeque Dei in ipsam merita et vigilantius custodiret, et celaret attentius, vel sane ingentem molestiarum, quâ paene obruta, molem, vel gladium acutum, qui ipsius animam in acerbissimâ Filii morte transfodit, penitus inspiciamus, quis profecto non intelligat, dicere quam verissime posset: *Exsultata autem, humiliata sum, et conturbata: defecit quippe in dolore vita mea, et anni mei in gemitibus?*

Respexit igitur Deus humilitatem ancillae suae, et post mortalis hujusce vitae usuram: Exue te, inquit, stolâ luctus, et vexationis tuae, et indue te vestimento laetitiae, indue decore, et honore ejus, quae a Deo tibi est, gloriae sempiternae. Implevi jam splendoribus animam tuam, haud patiar nunc corpus tuum videre corruptionem; sed circumdabo te diploide justitiae, et ponam diadema regni in capite tuo, et faciam te regnare. Et sane quae una ex omnibus illius simillima fuerat inventa, qui cum in formâ Dei esset, semetipsum exinanivit formam servi accipiens, eadem quoque digna, quae in ejusdem gloriae partem esset vocata.

An vero vel bonitatis, vel Dei majestatis omni-

no fore videbatur , ut sub mortis imperio illius Mater diu perculsa jaceret , qui resurrectio est , et vita ? ut caro , ex quâ victima illa efficta , quae caeli portas hominibus reseravit , in caelum et ipsa quam primum non eveheretur ? ut corpus , quod ne vel minimum quidem non modo avitâ primi parentis noxâ , sed neque ullâ vel levi Adae filiis communi labe umquam infectum , eorum maledicto esset obnoxium , et quod hic in terris Dei tabernaculum exstiterat , in aeterna statim tabernacula non deduceretur ? Tum scilicet et quam Dei Matris infinita propemodum dignitas postulabat , plane cumulata , et quam sibi Christus devictâ morte comparaverat , longe cumulatior gloria videbatur , cum Virgo Mater in aethereas evecta sedes adstitisset Regina a dextris ejus circumdata varietate .

Quâ quidem ex re in hac sacrâ Virginis triumpho die , cum corporis nequaquam liceat , mentis saltem oculis Israël arcam suspiciamus , quae aliquamdiu sub pellibus in deserto commorata , evolat tandem super pennas ventorum , atque ab vero David caelesti excipitur Jerusalem . Mihi quidem videre videor obviam ei certatim prodeuntes et veterum Patrum coetum , qui eam procul jam adspexerant , ac salutaverant , et Prophetarum agmen , qui venturam , et Matrem aequae , ac Virginem futuram tanto ante praedixerant , et Martyrum cohortem , praesertim vero quos lucis ipso

in limine Christi insecutor sustulit , ceu turbo nascentes rosas , et singulas quasque caelestis militiae acies , qui omnes caelo , terraque potenti Dominae plaudentes , alternis concinunt : Attollite jam portas principes vestras , et elevamini portae aeternales , et introibit REGINA gloriae . Ecce enim quae pulcra ut luna , electa ut sol , terribilis ut castrorum acies ordinata . Veni innixa super dilectum tuum : veni , coronaberis . Tum vero amicta sole , et luna sub pedibus ejus , et in capite ejus corona stellarum duodecim ; positusque est thronus matri Regis , quae sedit ad dexteram ejus : prorsus ut quae caelestium donorum copia , atque honoris amplitudine mortalibus ceteris quam maxime praestabat , eadem quoque gloria , et potestate longe , multumque antecelleret .

Quid porro nos exsules adhuc filii Hevae in anniversaria hac triumphantis Virginis gratulatione , nisi ut laetantibus Angelis , Caelitibusque exsultantibus concinamus ? Fecit tibi Dominus magna ; ecce enim ex hoc beatam te dicent omnes generationes . Cum vero in altissimo illo dignitatis gradu sit collocata , eaque praedita potestate , ut , cum a Deo discesseris , nulla major possit inveniri , quam in communi omnium laetitia praecipua nos praeter ceteros voluptate perfundemur ? quibus gaudiis exultabimus ? Quid enim sperare ab ea non liceat , quae sane materno in omnes est animo , praesertim vero in hanc Urbem , quam placido semper

vultu respicere , ac singulari quodam suae tutelae praesidio tueri ostendit , cum pluribus quidem nominibus , tum vel maxime , quod veritatis magistra , sacrorum moderatrix , eum complectitur , qui in Ecclesiae totius principatu Petro succedens , vicariam Christi hic in terris , gerit operam ? Laetemur igitur , atque hodierno die exsulemus ut cum maxime tam praesentissimo Virginis patrocinio ; simul et tanta ejus in nos merita eâ , quâ par est , gratâ animi benevolentia prosequamur , ut et supplicibus cumulemus semper altaria donis , atque omnes unâ et mente , et voce adprecemur : *Tu maxima Virginum , maxima Matrum : Tu et tutela praesens , spes et fidelissima Romae principis urbium , respice perpetuè de caelo , et vide , et visita Urbem hanc , tuo potissimum numini , majestatique dicatam .*



DE DIE FESTO OMNIVM SANCTORVM

O R A T I O

HABITA AD PIVM VII. PONT. MAX.

In Sacello Pontificio Quirinali

KALENDIS NOVENBRIEVS AN. MDCCCXXI.

Salve festa dies, BEATISSIME PATER, quae tam candida, ac laeta nobis omnibus illucescis, ut terrestris haec Jerusalem cum caelesti illâ consociata alternis hymnis, et canticis eum certatim collaudet, qui in excelso sedet throno, et cui soli omnis honor, et gloria. Videre scilicet mihi videor hodierno die tot cum millibus Angelorum millium turbam illam magnam caelestium civium, quam dinumerare nemo potest, qui omnes procidentes ante sedentem in throno, et adorantes viventem in saecula saeculorum, cantant canticum novum: *Dignus es, Domine Deus noster, accipere gloriam, et honorem, quoniam redemisti nos in Sanguine tuo, et fecisti nos Deo nostro regnum.* Enimvero laetis hisce dum personat laudibus caelestis urbs Jerusalem, caeli corusca civitas, profecto nos almae Sionis aemuli illi canentes sociemur oportet, quippe qui cives jam Sanctorum, et domestici Dei ejusdem gloriae participes speramus aliquando futuros. Num quid enim nobis ju-

cundius, num quid praestabilius, quam ut admirantes intueamur tot caelestis regni incolas, qui eadem, quâ nos, mortali carne induti, peregrini et ipsi hic in terris quondam fuerunt. Quid porro aequius, et congruentius, quam ut eorum victorias, triumphosque, quanto maximo licet, laetitiae, ac pietatis sensu concelebremus?

Exsultant igitur Sancti in gloriâ, laetantur in cubilibus suis. Quam enim dilecta tabernacula tua, Domine, virtutum! quam gloriosa dicta sunt de te, civitas Dei! Fundamenta siquidem ejus in montibus sanctis omni lapide pretioso ornata: singulae portae ejus singulis micantes margaritis; et platea civitatis aurum mundum tamquam vitrum perlucidum. Neque jam templum in eâ est, sed Dominus Deus omnipotens templum illius, et agnus: neque civitas haec eget sole, neque lunâ, ut luceant in eâ, sed claritas Dei illuminat eam, et lucerna ejus est Agnus.

Jam vero hoc in tabernaculo Dei cum hominibus, nonne Deus ipse habitat cum eis, et ipsi populus ejus sunt, et Deus ipse cum eis erit perpetuò eorum Deus? Ita non esurient ipsi, neque sitient ampliùs; non cadet super illos sol, neque ullus aestus; sed absterget Deus omnem lacrimam ab oculis eorum, et mors ultra non erit, neque luctus, neque clamor, neque dolor erit ultra, quia prima abierunt. Hinc porro quinam effusi laetitiae motus! quae magna mentis gaudia! cum Deum i-

psum non jam per speculum , et in aenigmate , sed videant facie ad faciem , et cognoscant , sicut et cogniti sunt . Inebriantur videlicet ipsi ab ubertate domus Dei , propterea quod Dominus laetificat eos in gaudio cum vultu suo , et torrente voluptatis potat eos , cum Agnus illorum sit fons vitae , et in lumine ejus videant lumen . Quamquam quis ignorat , quod neque oculus vidit , neque auris audivit , nec in cor hominis ascendit , quae prae-paravit Deus . iis , qui diligunt illum ?

At quinam isti sunt , qui ascenderunt in montem Domini , et jam stant in loco sancto ejus ? Ecce tibi ante omnes , quae se humilem Domini ancillam professa , summo Dei Genitricis honore fuit dignata , et cujus animam in acerbissimâ Filii morte doloris gladius pertransivit , quae tamen nunc amicta sole , et luna sub pedibus ejus , et in capite ejus corona stellarum duodecim , positusque est thronus matri Regis , quae sedet ad dexteram ejus .

Inde vero et tot Angelorum millia adstantium ante thronum , et collaudantium Dominum ; et qui vocatus ab utero matris suae , vox fuit clamantis in deserto , et praeivit ante faciem Domini parare vias ejus ; et qui Genitricis Dei Sponsus , idemque illius nutritor , et custos , quem misit Deus Filium suum , factum ex muliere , ut deleret , quod adversus nos erat chirographum decreti , affigens illud cruci .

Post hos sese offert veterum Patrum coetus , qui

humani generis Redemptorem procul jam adspexerant, ac salutaverant, simul et Prophetarum agmen, qui eum in tempore venturum, et tam dira ab hominibus passurum tanto ante praedixerant.

Age jam inspiciamus, quem undeni alii comitantur. Ille quidem Apostolorum Princeps, cui traditae claves Regni caelorum, et cujus fides numquam defectura, neque in iis, qui hac eadem Romanâ in Cathedrâ deinceps collocandi. Multum hic orat pro populo Dei, maxime vero pro eo, qui arcano divinae Providentiae consilio eadem nunc in Cathedrâ sedet, ut Deus pro totius Christianae reipublicae bono dies super dies ejus adjiciat. Sunt autem omnes, quorum sonus exivit in omnem terram, et verba in fines orbis terrae, ut Christi fidem barbaris quibusque gentibus, ac disjunctissimis populis annuntiarent, eosque ad justitiam erudirent. Ut fulgent, ac fulgebunt ipsi quasi stellae in perpetuas aeternitates! et cum venerit Filius hominis in sede majestatis suae, sedebunt et ipsi super sedes duodecim judicantes duodecim Tribus Israël.

Sed quinam exercitus ille prope innumerus, qui omnes longo ordine stant amicti stolis albis, et palmae in manibus eorum? Hi nimirum sunt, qui venerunt ex magnâ tribulatione, et pro testamento Dei sua corpora tradiderunt; et laverunt stolas suas, ac dealbaverunt eas in sanguine Agni. Dominus porro quasi holocausta accepit eos, et posuit in capite eorum coronas de lapide pretioso.

Neque jam minor conspicienda cohors vel eorum, quos eremus incolas transmisit astris caelium, vel illarum, quae candida gestantes lilia, sequuntur Agnum, quocumque ierit, vel denique ceterorum omnium, qui carnem suam crucifixerunt, ut mortificationem Christi Jesu in eorum corpore circumferrent, et conformes fierent imaginis Filii Dei. Sunt enim (quis nesciat?) non modo ex cunctis gentibus, et tribubus, et populis, et linguis, verum etiam ex omni omnino et ordine, et conditione, et aetate, et sexu, qui omnes gratias nunc agentes Deo, qui deduxit illos in viâ mirabili, et fuit illis in velamento diei, et in luce stellarum nocte, tamquam scintillae in arundineto discurrunt, et habitantes in tabernaculo Domini, requiescunt in monte sancto ejus in saecula.

Jam vero nos in tantam, tamque cumulatam caelestium civium gloriam intuentes, laetemur utique in Domino, et exsulemus in tam insigni die solemnitatis eorum, qui facti jam amici Dei pervenerunt ad caelestia regna, et coronati possident palmam. Quam quidem palmam nos etiam post mortalis hujusce vitae stadium accepturos aliquando sperare debemus ab eo, qui vere mirabilis in Sanctis suis, affatim reddit eis mercedem laborum eorum, ut nos etiam beati inhabitemus in domo Domini, et in saecula saeculorum laudemus eum.

S. IOANNIS BAPTISTAE

ORATIO (*)



Caelitum omnium festi dies, BEATISSIME PATER, si ab Dei Genitrice discesseris, ii profecto aguntur, cum ipsi ex mortalis huiusce vitae statione ad caelestem illam, beatamque patriam laetantes tandem demigrarunt. Tum enim tot perfuncti periculis, tot defessi laboribus, tot coronati palmis, tot triumphis illustres immensum illud gloriae pondus, atque immarcescibilem consequuti sunt coronam, quam iis omnibus praeparavit Deus, qui bonum certamen certarunt, cursum consummarunt, fidem servarunt. At vero hodierno die natalem illius solemniter recolimus, qui a Prophetis, atque ab Angelo praenuntiatus, quique vocatus, et simul Spiritu sancto repletus ex utero matris suae, ut pararet vias Domini, et rectas faceret semitas ejus. Hoc autem quid illustrius? quid honorificentius, omnique admiratione, et praedicatione dignius? Quod dum ego in tam augusto loco, atque in hoc amplissimo terrarum orbis consessu ad breviter commemorandum pro viribus ag-

(*) Habenda quidem coram Pont. Max., at nunquam habita.

gredior, quaeso, obtestorque te, BEATISSIME PATER, ut me dicentem benignitate tua recrees, et sustentens, ne rerum gravitate obrutus videar deficere.

Quae igitur, et quam mira Baptistae nativitatem vel praecedere, vel comitari, vel subsequi visa sunt! Illa quidem tanto ante divinitus praenuntiata: Ecce mitto Angelum meum, qui praeparabit viam ante faciem meam: priusquam te formarem in utero novi te, et antequam exires de ventre sanctificavi te, et Prophetam in gentibus dedi te: ecce dedi te in lucem gentium, ut sis salus mea usque ad extremum terrae.

Neque vero id satis. Quamquam enim haec omnia tanto ante de Baptistâ per Prophetas Deus ipse praedixerat, nonne ejus adventante nativitate misit Deus idem Angelum suum, qui haec eadem annuntiaret Zachariae, ex quo erat ipse oriturus? Apparuit scilicet illi Angelus Domini stans a dextris altaris incensi; neque solum ejus ortum, sed nomen etiam praedixit, ac simul qui, quantusque futurus esset in tempore: Ne timeas Zacharia, uxor tua Elisabeth pariet tibi filium, et vocabis nomen ejus Joannem: erit enim magnus coram Deo, et Spiritu sancto replebitur adhuc ex utero matris suae, et praecedet ante illum in spiritu, et virtute Eliae parare Domino plebem perfectam. Quid, quod Zacharias tam nova, atque inaudita cum non ita facile credenda putasset, Archangelus Gabriel, unus ex iis, qui adstant ante Deum, vaticinia vatici-

niis , prodigia prodigiis addens , loquendi facultate non amplius eum usum fuisse subdidit , dum praenuntiata obvenirent ? Ecce eris tacens , et non poteris loqui usque in diem , quo haec fiant .

Age jam , inspicere Joannem in utero matris sexto vix mense exacto . Ecce tibi Maria , quae jam fecunda Deo , exsurgens abiit in montana cum festinatione in civitatem Juda , et intravit in domum Zachariae , et salutavit Elisabeth . Quae autem salutatio istaec , quâ non mater modo , sed Joannes etiam dignatus , ut Dei Genitrix , immo Deus ipse eum inviseret ? Nulla profecto neque major , neque praestantior , propterea quod ut audivit salutationem Mariae Elisabeth , haec quidem repleta sancto Spiritu cognovit matrem Domini sui , eamque benedictam praedicavit inter mulieres , et benedictum fructum , quem in ventre gestabat ; infans vero exsultavit in gaudio in utero ejus , „ et „ quem , inquit Augustinus (1) , non poterat vocibus , salutat motibus . „ Ita Joannes in luminis auras nondum exortus non modo primi parentis labe jam omnino ablutus , et charismatum donis cumulatus , verum etiam divino concitus spiritu et praenovit , et praemonstravit , quem veteres Patres tantopere exoptarant , et quem Prophetæ tanto ante adfuturum praedixerant Dei Agnum , qui tolleret peccata mundi . Qua de re quis cum Chrysologo non jure exclamet (2) ? „ Ante pervenit ad cae-

(1) *Serm.* cccxi. et v. in natal. S. Joan. Baptist. (2) *Serm.* xci.

„ lum , quam tangeret terram : ante accepit spi-
 „ ritum divinum , quam humanum : ante suscepit
 „ divina munera , quam corporis membra : ante
 „ coepit Deo vivere , quam sibi . „

Jam si haec de Joanne priusquam vitales hasce
 hauriret auras , quae , et quanta , quaeso , ubi Eli-
 sabeth impletum est tempus pariendi , et peperit
 filium ? Quae nimirum gratulationes ! quae laetitiae ,
 et exultationis voces , quia magnificaverat Domi-
 nus misericordiam suam cum illâ ! qui porro ti-
 mor super omnes vicinos eorum , et super omnia
 montana Judaeae , ubi divulgabantur omnia verba
 haec : Quis putas puer iste erit ? etenim manus Do-
 mini erat cum illo . Tum enimvero apertum est os
 Zachariae , et repletus Spiritu sancto loquebatur
 dicens : Benedictus Dominus , quia visitavit , et fe-
 cit redemptionem plebis suae ; et quia natus jam
 puer , qui Propheta Altissimi futurus , quique
 praeibit ante faciem Domini parare vias ejus . Et
 sane (1) „ Propheta Joannes , et plusquam Pro-
 „ pheta , immo ante prophetare , quam profari ,
 „ prius Deum , quam seipsum sentire poterat , paren-
 „ tes quoque suos Prophetas faciebat , et in eos , qui
 „ in se transfuderant carnis substantiam , spiritus sui ,
 „ et gratiae superabundantiam infundebat . „

Quid porro aequius , quidve congruentius , quam
 ut (2) „ cum aliis in Sanctis , et electis Dei ea

(1) Guerricus Abbas *Serm.* 1. de Nativ. S. Joannis .

(2) *Serm.* cxcvi. in Append. oper. S. August. Tom. v.

„ colitur dies , quâ illos post consummationem la-
 „ borum , et devictum , triumphatumque mundum
 „ in perpetuas aeternitates praesens haec vita par-
 „ turiit , et consummata ultimi diei merita cele-
 „ brantur ; tum vero in Joanne prima etiam dies ,
 „ et vel ipsa hominis initia consecrentur ? Ni-
 „ mirum Joannes nondum natus de secreto ma-
 „ terni uteri prophetavit , et expers lucis jam te-
 „ stis fuit veritatis ; (1) neque ullam infantiae sen-
 „ sit aetatem , qui supra naturam , supra aetatem , in
 „ utero situs matris , a mensurâ perfectae coepit aeta-
 „ tis plenitudinis Christi . „ Neque vero aliter fieri
 „ posse videbatur , siquidem Joannes ex omnibus
 „ divinitus selectus (2) , qui lucerna esset ardens ,
 „ idest Spiritus sancti igne succensus mundo igno-
 „ rantiae nocte possesso lumen salutis ostenderet , et
 „ quasi inter densissimas delictorum tenebras splen-
 „ didissimum justitiae Solem lucis suae radio demon-
 „ straret , et de se ipso dicens : *Ego vox clamantis in*
 „ *deserto , ut videat omnis caro salutare Dei .* „

Laetemur igitur quam maxime in hoc tam sole-
 mni Joannis natali die , et dum Christum sequi-
 ti dicimus : *Inter natos mulierum non surrexit major*
Joanne Baptista , festis etiam concinamus vocibus :

Serta ter denis alios coronant

Aucta crementis , duplicata quosdam ,

Trina te fructu cumulata centum

Nexibus ornant , - MAXIME VATVM .

(1) S. Ambrosius in *Luc. L. 11* , (2) *Serm. cit. in Append. S. Aug.*

PII VII. PONT. MAX.

*Ad sanctae Mariae , cui ab precatione ,
et morte nomen .*

Archisodalitas sanctae Mariae , cui ab precatione , et morte nomen hic in Urbe viâ Juliâ ad Tiberim , ut PIO VII. Pont. Max. , et Sodali amplissimo , ingenti cum omnium moerore , ac luctu nuper defuncto , meritos , debitosque tribueret honores , justa solemnia solvenda curavit . Itaque sacra aede funereis pereleganter ornata peripetasmatis auro lemniscatis , et cereorum copiâ undique collucente , magnifico excitato funebri pegmate , cui splendida superposita lodix ex serico villosa , et auro intertexta , quam JOANNES TURLONIA Sabatiae , seu Braceni Dux , ac primus ejusdem Archisodalitatis Hetaeriarcha dono dederat , IX. Kal. Octobres an. MDCCCXIII. primâ luce piacularia sacra peragi coepta , exinde Sodales frequentissimi statas pro defunctis horas rite concinuerunt , postremo sacris solemnibus cum cantu operatus Praesul CONSTANTINUS ex Marchionibus PATRICIIS XII. Vir urbanus sacri Consilii litibus judicandis , et ejusdem Archisodalitatis Gubernator , nunc vero Archiepiscopus Philippensis , et Abbas trium Fontium . Neque jam inscriptiones defuerunt , quae praeclara tanti Pontificis gesta singillatim referrent . Nam

(22)

In templi fronte .

PIO . VII. PONT. MAX.

ARCHISODALITAS . SANCTAE . MARIAE
CVI . AB . PRECATIONE . ET . MORTE . NOMEN
PRINCIPI . SACRATISSIMO . SODALI . AVGVSTO
DEBITOS . FVNERIS . HONORES

In utrisque interioris templi lateribus .

I.

PIVS . VII. PONT. MAX.

PETRI . NAVEM . SAEVIS . IACTATAM . FLVCTIBVS
SINGVLARI . PROVIDENTIA . IN . ARDVIS
MIRA . ANIMI . FIRMITATE . IN . ADVERSIS
INCOLYMEM . IN . PORTV . COLLOCAT
RELIGIONIS . VINDEX . ACERRIMVS

II.

PLVRES . CAELITVM . ORDINIBVS . ADSCRIBIT
SOCIETATEM . IESV . RESTITVIT
CLANDESTINIS . CONVENTIBVS . INTERDICIT
PONTIFICIAE . DITIONIS . PROVINCIAS . RECIPIT
OPTIMAS . DISCIPLINAS . AC . LIBERALES . ARTES
IN . SPEM . VETERIS . GLORIAE . ERIGIT
PONTIFEX . VIGILANTISSIMVS
PRINCEPS . MVNIFICENTISSIMVS

III.

MAXIMIS . CVMVLATVS . HONORIBVS
AB . QVIBVSQVE . GENTIBVS . ET . PRINCIPIBVS
NIHIL . DE . INNATA . MODESTIA . REMITTIT
HVMANITATE . BENIGNITATE . IMPERII . LENITATE
CVIQUE . CARISSIMVS

REM . CHRISTIANAM
TEMPORVM . ASPERITATE . AFFLICTAM . PERTVRBATAM
RELEVAT . COMPONIT
EPISCOPALES . SEDES . CONSTITVIT
LEGATOS . ET . VIROS . APOSTOLICOS
IN . AMERICAM . VSQVE . MITTIT
CATHOLICAE . RELIGIONIS . FIRMANDAE
ET . PROFERENDAE . CAVSSA
IN . DISIVNCTISSIMIS . ET . FLORENTISSIMIS
TERRAE . TRACTIBVS
PASTOR . DE . VNIVERSO . CHRISTI . GREGE . SOLLICITVS



INSCRIPTIONES

In iustis funeribus regio apparatu solutis FERDINANDO I. utriusque Siciliae Rege ad sancti Spiritus Romae viâ Juliâ idib. sextil. an. MDCCCXXV.

In fronte templi
FERDINANDO . I.

VTRIUSQVE . SICILIAE . ET . IERUSALEM . REGI
PRINCIPI . OPTIMO . BENE . MERENTISSIMO
NEAPOLITANI . PARENTANT

In interiore templi parte

Supra fores

FERDINANDVS . I.

KAROLI . III. HISP. ET . IND. REGIS . CATHOLICI . F.

NONVM . AGENS . ANNVM

VTRIVSQVE . SICILIAE . ET . IERUSALEM . REX . SALVTATVS

OBIIT . III. NON . IANVAR, AN. PIACVLARI . MDCCCXV.

AET. AN. LXXIII. M. XI. D. XXIII.

VIVIT . IN . OMNE . AETVM

In utrisque lateribus

I.

S. FRANCISCO . A . PAVLA . PRODIGIIS . INSIGNI
SACRA . AEDES . BASILICE . EXCITATA . EX . VOTO

II.

MAXIMO . CVM . CATHOLICAE . RELIGIONIS . BONO
CONVENTVM . INITVM . CVM . PIO . VII. PONT. MAX.

III.

LIBERALES . ARTES . AC . SEVERIORES . DISCIPLINAE
REGIA . MVNIFICENTIA . IN . SPEM . VETERIS . GLORIAE
REVOCATA E

IV.

NEAPOLITANA . GENS . OBVIAM . EFFVSA
PRINCIPI . INDVLGENTISSIMO . REDVCI . AN. MDCCCXV.

V.

OPPIDVM . CVI . A . SANCTO . LEVCIO . NOMEN
INGOLIS . REFERTVM . OPIFICIBVS . INSTRVCTVM

VI.

ITINERA . STRATA . INDIGENAE . MERCES . FORAS . ASPORTATAE
MAGNO . CVM . MERCATVRAE . COMMODO

Inter structiles columnas hinc , et illinc .

I.

BENEFICENTIA . LENITATE . SERMONIS . FACILITATE
POPVLOS . SIBI . SVBEDITOS . DEVINCIT
CONSILIO . INDVSTRIA . PROVIDENTIA
HOSTIVM . IMPETVM . ET . APPVLSVM
AB - SICILIA . VIRILITER . PROHIBET
NOVARVM . RERVVM . MOLIMINA
OPPORTVNE . COMPESCIT . EVERTIT
PRINCEPS . IMPERIO . NATVS

II.

AVITAE . RELIGIONIS . AEMVLATOR
NEMINI . PIETATE . SECVNDVS
NVMQVAM . ADVERIS . FRACTVS
NEQVE . PROSPERIS . REBVS . ELATVS
IN . TAM . DIVTVRNO . PRINCIPATV
PVBLICA . SEMPER . COMMODA . CVRAT
POTENTISSIMORVM . PRINCIPVM . FOEDERE . ILLVSTRIS
REX . SVIS . CARISSIMVS . OMNIBVS . PROBATISSIMVS

In zophoro aediculae sepulcralis :

Virtutis quantum nox uno in funere claudit !
Illico ferali complentur ut omnia luctu !
Aetna tonat latebris, strepit, immugitque Vesevus,
Aufidus , et moestâ Sebethos refluit undâ,
Parthenopes gemitu responsant claustra Pelori .

In honorario tumulo ibidem collocato :

IN . VRNA . CINERES . IN . FASTIS . NOMEN

INSCRIPTIONES

In MARIAE ALOISIAE BORBONIAE
hic in Urbe defunctae amplissimo , ac magnificen-
tissimo funere ad sanctorum XII. Apostolorum .

In templi fronte :

MARIAE . ALOISIAE . BORBONIAE

LVCENSIVM . DVCİ

KAROLVS . LVDOVICVS

PARENTI . AMANTISSIMAE

MOERENS . IVSTA . SOLEMNIA

In primâ interioris templi parte.

Supra fores :

MARIA . ALOISIA

KAROLI . IV. BORBONI

HISP. ET . IND. REGIS . CATHOLICI . F.

LVDOVICI . I. ETRVRIAE . REGIS . VXOR

NATA . AN. XLI. M. VII. D. VII.

DECESSIT . III. ID. MART. AN. MDCCCXXIV.

In quatuor funerei pegmatis lateribus :

I.

MIRA . IN . DEVM . PIETATE

IMPENSO . IN . CATHOLICAM . RELIGIONEM . STUDIO

PERPETVO . IN . PETRI . CATHEDRAM . OBSEQUIO

PRINCEPS . FEMINA . IN . EXEMPLVM . NATA

II.

ADOLESCENS . VIRO . ORBATA
TOTA . IN . OPTIMA . FILIORVM . INSTITVTIONE
ET . IN . REGNI . PROCVRATIONE
SVI . MAGIS . QVAM . ALIORVM . DOMINA

III.

IMPERIO . LENI
ADITV . FACILI . ALLOQVIO . BENIGNO
PROLIXA . IN . ORPHANOS . ET . EGENOS . NATVRA
OMNIBVS . PROBATISSIMA

IV.

HINC . ATQVE . ILLINC . EIECTA . MVLTIMODIS . VEXATA
DIVTVRNI . MORBI . CONFLICTATA . MOLESTIIS
ANIMO . SEMPER . VIRILI
SPECTANS . CORONAM . GLORIAE

Principis Feminae cadaver Româ asportatum Lucam, eoque pervenit iv. Idus Apriles anni ejusdem emortualis. Tum verò pridie Idus proximas magnificentissimum, ac verè regium celeberrimo cum omnium ordinum concursu instauratum funus in templo Cathedrali Lucensi, ubi perelegantes appositae honorariae inscriptiones ab eruditissimis viris elucubratae, et laudatio funebris habita ab Presbytero Dominico Bertinio doctore decuriali Philosophiae in Regio Lyceo, qui moriens magnum sui desiderium reliquit.

(28)

Ad ALOISIAM KAROLINAM BORBONIAM
post gravem morbum sanitati restitutam exeunte
Februario an. MDCCCXX.

ALOISIA . KAROLINA . BORBONIA

VIRGINE . MARIA . ET . CAMILLO . DE . LELLIS

DEPRECATORIBVS

ATQVE . HIPPOCRATICAE . ARTIS . PRAESIDIIS

OPPORTVNE . ADHIBITIS

E . GRAVI . MORBO . MATVRRIME . RECREATA

AVGVSTAE . GENITRICI

PIENTISSIMAE . ET . AMANTISSIMAE

REGIA . ADOLESCENTVLA . FILIA . CARISSIMA

SOSPES . REDONATA . EST

EX . PVBLICO . VRBIS . VOTO

Neptis haec KAROLI IV. Regis Catholici , ut
pote orta ex MARIA ALOISIA BORBONIA Lu-
censium Duce, et filiâ Regis ejusdem. Nunc vero nu-
pta MAXIMILIANO germano fratri ANTONII CLE-
MENTIS Saxoniae Regis . Femina verò princeps
morum probitate , ingenii acie , prudentiâ , mode-
stiâ , sermonis affabilitate omnibus quam maxime
probata .



PRINCIPI . EMINENTISSIMO
IOANNI . FRANCISCO . FALZACAPPÆ

S. R. E.

PRESBYTERO . CARDINALI
TITVLO . BASILICAE . FONTIS . OLEI
PATROCINIUM . AVSPICANTI
COLLEGII . PHARMACEVTON
AD . SANCTI . LAVRENTII . IN . MIRANDA
FORO . ROMANO
VI. ID. SEXTILES . AN. MDCCCXXIX.
CONSVLES . ET . HETAERIARCHÆ
OBSEQVI . ET . GRATI . ANIMI . CAVSSA

E P I G R A M M A .

Expectatus adest doctrinâ insignis , et ostro ,
Religione tamen clarior ecce micat .
Incorrupta fides olli , et mens provida rerum ,
Tam placidi mores , tantus in ore decor .
Est aditu facilis , congressu comis in omnes ,
Scilicet aspectu , colloquioque beat .
Ergo veni , Princeps : Te Praeside , Teque Patrono ,
Spes nempe , ut nostrum fervere possit opus ,
Quò citiùs pellant medicatis pharmaca succis
Morbos , et subitam sentiat aeger opem .
Quas Tibi nunc agimus grates , quas semper agemus ,
Excipe , et exiguum pignus honoris habe .

Ad ALOISIVM TOGNIVM

cum e letali morbo convaluerat ineunte Februario
AN. MDCCCXXIX.

ALOISIO . TOGNIO

EX . CC. RR. MINISTRANT . INFIRMIS
CENSORI . AD . EPISCOPATVM . PROVEHENDOR.
HAERETICAE . PRAVITATIS . HÆTATETH
QVOD
DEO . AVSPICE
DEI . GENITRICE . ET . CAMILLO . DE . LELLIS
SVFFRAGANTIBVS
HIPPOCRATIS . AEMVLIS
OPPORTVNA . QVAEQVE . ARTIS . PRAESIDIA
TEMPESTIVE . CONFERENTIBVS
AMICIS . ASSIDVITATE . ET . OPERA
DIV . NOCTVQVE . ADIVVANTIBVS
EX . CAECO . ET . LETALI . MORBO . RECREATVS
VIRO . INGENIO . DOCTRINA . PRVDENTIA . COMITATE
CVIQVE . CARISSIMO
OMNI . EX . ORDINE . CIVES . VOTI . COMPOTES
GRATVLANTVR . PLAVDVNT
ET . DIVTVRNAM . ANNORVM . SERIEM . AVGVRRANTVR
Excipe , quae tantum potis est tibi mittere , TOGNI,
Qui nihil ingenio , qui nihil arte valet .
Est indocta quidem , nullo et laudabilis umquam
Nomine , crede mihi , sed dat amica manus .
Scilicet illius , qui aevi te flore nitentem
Edocuit , quidquid Tullius ipse docet .
At nunc confectus senio , morboque laborans
Dimisit Musas , deposuitque stilum .

E L E G I A

DEI GENITRICIS EIVSQVE SPONSI

P A T R O C I N I V M

*Poeta ab hinc quatuor annos caeco , molestoque
morbo laborans humili prece implorat .*



Dum mea crudelis torquebat viscera morbus ,
Nec requies misero nocte , dieque datur ;
Tentavi , fateor , persaepe Machaonis artem ,
Praesidii expertus quidquid et illa docet .
Omnia sed frustra ; nullum mihi quippe levamen ,
Spes concepta diu tota salutis abit .
Tunc supplex tremulas tendens ad sidera palmas ,
Rectiùs effudi vota , precesque Deo .
Nec satis : auxilio Superos ego quosque vocavi ,
Si faciles vellent ferre potenter opem .
Ac primum , quae longe omnes supereminet una
Alma Dei Genitrix , virgo , parensque simul .
Tum qui selectus custos Sponsaeque , Deique ,
Quem superâ omnipotens misit ab arce Pater ,
Ut mortale genus mortali indutus amictu
Daemonis e diro solveret ille iugo .

Adsis o ! Regina potens terrâque , poloque ,
Neve meas , quaeso , sperne benigna preces .
Tu mihi praesidium , spes tu fidissima nostri ,
Exorata pias porrige , Virgo , manus .
Sis quoque propitius , Tu , cui (mirabile dictu !)
Aeternae sobolis tradita cura fuit .
Quid metuam , si rerum ambo tutela mearum ,
Placati , spero , vultis adesse mihi ?
Vos equidem supplex iterumque , iterumque vocabo ,
Dum vestro tandem numine sospes ero .
Atque utinam voti compos persolvere grates !
Atque utinam videar munera digna dare !
Ut reliquum placidè possim traducere vitae ,
Supremumque dein laetus obire diem .



P R O L V S I O

HABITA IN COLLEGIO ROMANO

REVENTE ANNO SCHOLASTICO MDCCXCVI.

Scholae Fastidia.

In nostrum properans tendebam ex more Lyceum,
Nescio quid meditans, memini si fortè, molesti,
Cum me compellat quidam nec nomine notus,
Arreptâque manu, sic ut diffringere vellet:
O! quid agis, quo tendis, ait, dulcissime rerum?
Siste gradum; talos nam mox tibi sudor ad imos
Manabit, diram valeat qui adducere febrem.
Mirari tacitus: verum ne fortè viderer
Rusticus, o nimium, subito responso, benigne!
Et simul accelero; jam quippe advenerat hora,
Cum juvenum turmae volitant haec atria circum,
Sive alias tentare juvat nugasque, jocosque.
Ille autem assectari, instare, et me usque tenere,
Dum ventum ad limen. Subridens, inquit, amice,
Haud malè te dicam nunc terque, quaterque beatum:
Namque tibi ex paucis, non fallor, contigit uni
Hic curis vacuum tranquilla per otia vitam
Ducere: scilicet immensus docuisse puellos
Est labor, et magnâ semper dominarier aulâ.
Quid clamosi adeunda fori si jurgia? quidve
Si foret alterius pendendum semper ab ore?
Nam neque nunc memorem, quae multa pericula miles

Saepe subit, caplet tenues ut nominis auras ;
Vel quae mercator saevo jactatus ab austro ,
Dum sibi longinquis quaerit compendia terris .
Hic non parva mihi , fateor , jecur urere bilis ,
Plura etiam tacitus jam respondere parabam ,
Sentiret tandem , se nil nisi inepta loquutum .
Quid facerem ? silui : multorum scilicet unus ,
Omnes despectant , suspendunt qui omnia naso ,
Et quos , cum semel insedit sententia menti ,
Numquam dimoveas . Tantum , jam perge parumper ,
Addo , nec pigeat saltem nunc cernere coram ,
Quam leve sit munus , quantum simusque beati .
Subsequitur , ridetque manum considerare scamnis
Cum videt hic juvenum : magis , ac magis ille beatos
Nos vocat : en hilaris circumstat namque corona .
Sistimus : haud mora , divisos stridere susurros
Audit , nec leviter mox clamitat unus , et alter ,
Aut socio irridet , saepe et convicia nectit ,
Aut se culpatum quaeritur nil tale merentem ,
Supploditque pedes frendens , vellitque capillos
Igneus , et totam complet clamoribus aulam .
Nec satis : hic nictat , distorquet et ora cachinnis :
Vix potis est alter limbo compescere risum ,
Muscas dum fallit , plumas quae deinde sequaces
Ducant , linteolo curat vel fingere murem ,
Atque alios alii jocosos agitantque , struuntque ,
Possint ut semper , quae seria , vertere ludo .
Siccine ? tunc ille : haud equidem me talia rebar
Cernere : discedam , quippe haec fastidia vexant ,

Et dolet e strepitu caput . Ecquid , dic age , sodes ,
Inquam , forte tibi si ex ortu solis ad umbram
Tam tenuis labor , aut haec otia blanda ferenda ?
Quid porrò pueri si in vitia prava ruentes ,
Nec minima est turba , aetatem jam vincere certent
Nequitia , foveantque , heu ! dirum corde venenum ,
Haeserit ut penitus miseris letalis arundo ?
Crede mihi , spes tu semper moliris inanes ,
Poeniteat coepti : mirum si contagia pestis
Non serpant , sanos tabes nec lurida tangat .
Adde modo ingratas multorum saepe querelas :
Scilicet haud dubitant vitio doctoribus usque
Vertere , si pueros nec prima elementa loquendi ,
Nec quidquam didicisse vident , plerumque parentum
Dum culpandus amor , turpisque incuria prolis .
Nam quid agat doctor tum , cum nihil aemula virtus ,
Nil laudis stimulus , monitus , nil verbera prosunt ?
Ille sub haec : Fateor , non parvo errore tenebar :
Nil habeo , quod dicam . Extemplo sternuere omnes ,
Ingentique simul strepitu jam emungere nares .
Tum vero scamnis chartae , graphiaria , libri
Excussi in terram magnam fecere ruinam .
Haec onerant aures , reboat namque undique fornix .
Ah ! quis me furor , aut quae me dementia cepit ?
Tunc ait , iratusque fugit mox ocior euro .



P R O L V S I O

HABITA IN COLLEGIO ROMANO

IN EVNTE ANNO SCHOLASTICO M D C C C I.

O D E

*Ad adolescentes , ut intermissa , studia acriùs
repetant .*

Quae me nunc subitò vis rapit acrior ,
 Ut dudum residem tendere barbiton ,
 Enitarque humilis carmina ducere
 Dircaeae ad numeros lyrae ?
 Vester me , juvenes , vester amabilis
 Coetus sollicitat ; viribus audeo
 Majora , insolito scilicet ociùs
 Afflor numinis impetu .
 Vos o ! laudis amor , vos simul aemula
 Virtus exacuat ; ludrica mittite ,
 Amotisque jocos serâ quaerite ,
 Artes quaerite Palladis .
 Numquam Pierii visere culmina
 Montis vos pigeat ; ferte per ardua
 Pindi ferte pedem , castaliâ comas
 Vestrum cingere laureâ .
 Tum quos eloquii volvite principes
 Jactat Roma potens , cultaque Graecia ,
 Fractis praesidium rebus , idoneos
 Belli reddere ferias .
 Regum alter validos contudit impetus ,
 Alter tela , faces , funera moenibus

Amovit patriis ; hinc decus , hinc opes ,
Nomen crevit et imperi .
Olim quae fuerint Socraticae domus
Scita , et quae Sophiae nunc penetralia
Tentans turba recens , pleniùs edocet ,
Spes o maxima patriae ,
Vobis nosse decet , discere clarior
Cur nunc luna micet , lumine palleat
Nunc defecta novo , litora verberet ,
Vel mox territa refluat
Siccis unda vadis , excita sedibus
Nutet terra suis , edita montium
Abruptis feriant fulmina nubibus ,
Sol cur temperet omnia .
Quid vicisse labor non potis improbus ,
Aevi flore nitens Romulidum cohors ?
Quid , quaeso , ingeniis usque feracibus
Cunctis non valet artibus ?
Quid nunc ingenuis non valet artibus ,
Si jam tergeminâ cingitur infula ,
Doctis qui tribuit praemia frontibus ,
Gentis delictum PIVS ?
Hunc propter meritis fulget honoribus
Virtus , pura fides , nudaque veritas ,
Seu cum sceptrâ gerat , credita seu velit
Caeli pandere limina ,
Tanto , Romulidae , plaudite Principi ;
Hunc summis , juvenes , tollite laudibus ;
Mecum quisque canat carmine SEPTIMVM ,
Mecum concelebret PIVM .

P R O L V S I O

HABITA IN COLLEGIO ROMANO

INEVNTÉ ANNO SCHOLASTICO M D C C C X V.

De M. Tullii Ciceronis laudibus.

Dulce sub autumnō , mihi credite , dulce Lycei
 Cessantem strepitu , ingratoque labore pueros
 Moribus , ac studiis ex ortu solis ad umbram
 Formandi , patrii remeare ad limina tecti ,
 Visere et umbrosos colles , ulmosque racemis
 Obductas , patulis saepe et spatiarier arvis .
 Hic ego difficilis dum grata oblivia vitae
 Ducebam , caeli , ac ruris dulcedine gaudens ,
 Non semel alterno curas sermone levabam
 Cum fratre , ac socio , quo non devinctior alter ,
 Quippe pilā , celerive trocho , jam lusimus ambo ,
 Et rigidum pueri plures toleravimus annos
 Doctorem . Properis quondam devenimus unā
 Passibus , abruptas rauco quā murmure lapsus
 Per rupes , cultos leni rigat agmine campos
 Fibrenus , partesque dein diductus in ambas
 Confluit , ac tacitis in Lyrin volvitur undis .
 Cespite tum viridi fessi consedimus omnes ,
 Et prior hic socius : Cernin , ut plurima circum
 Vimina praetexunt ripas ! ut populus illic ,
 Hic celebs platanus , laurique , alnique vicissim
 Consociant ramis umbras , gratumque recessum

Ut procul a turbis haec vasta silentia praebent !
 Nec male tu silvas Academi dixeris hasce ,
 Frater ait : Romae strepitum , populique tumultum
 Scilicet interdum fugiens , hic Tullius olim
 Fallere Socraticis suetus sermonibus horas .
 Nec dubitare licet : remanent vestigia ruris :
 Nam queis haec templi moles nunc surgit ad astra
 Saxa , columnaeque , eversae sunt rudera villae (1).
 Quid non consumis rebus damnosa vetustas ?
 At quae longa dies memori te deleat aevo ,
 Tunc ego ; quisve tuas , Tulli , non dicere laudes
 Gestiat , immortale decus , columenque Senatus ,
 Et latii pater eloquii ? Nam fluminis instar
 Nunc ruit immensus facundo Tullius ore ,
 Pectora nunc mulcens compescit melleus iras .
 Quis potior populi moderari , et vota Senatus ?
 Judicum et in miseros potior quis flectere corda ?
 Nempe armis victa , hunc propter se Graecia victam
 Sensit et ingeniis , nec dein Demosthenis artem
 Ausa , neque ingentem turbam jactare Sophorum :
 Illa quod edocuit , pandit nam plenius iste (2) .

(1) Locus hic non procul Arpino , et Sorà , eumque Fibre-
 nus alluit , ut graphice describit Cicero initio *Lib. II. de*
Legibus. Nunc vero aedes sacra BEATÆ VIRGINI, et Mona-
 sterium excitatum paulo post an. M. a sancto DOMINICO Ab-
 bate , qui natus annos ferme octoginta sub an. MXXXI. mira-
 culis clarus ibidem obdormivit in Domino , ac sepultus est .

(2) Quidquid graeci Philosophi excogitarunt , id omne Ci-

O ! memini , dilecte comes , tunc addidit alter ,
 Me totum exarsisse animis , actumque furore ,
 Dum puero discenda mihi , quae fulmina torquet
 Tullius , ut patriis , quas jam Catilina pararat
 Moenibus , arceret tecnas , incendia , caedes (1) .
 Quid ? tum frater ad haec , tibi si exaudire tonantem
 Forte datum eloquio , et miscentem voce Senatum ?
 Nonne vides , Rulli quam mirâ detegat arte
 Ipse dolos (2) , sedetque unus mutabile vulgus (3) ?
 Caesaris et tristes interdum temperet iras (4) ?

cero in suis de Philosophiâ operibus tam fusè , tam perspicuè , eâque sermonis venustate , et copiâ dicendi refert , exponit , ut nihil magis .

(1) Nimirum Tullius oratione primâ in Catilinam habitâ in Senatu , ac plenâ animi , et furoris , adeo eum perterrituit , ut proximâ nocte Româ discedens in Manliana castra contenderit .

(2) Oratione praesertim secundâ de lege Agrariâ in Rullum Tribunum plebis ejus legis latorem ita invecus , legemque ipsam tantopere improbavit , ut populus omni privato commodo posthabito , legem ipsam rejicere haud dubitaverit .

(3) Plebem concitatam , ac tumultuantem ex lege Rosciâ latâ ab L. Roscio Othone , quâ equitibus Romanis in quatuordecim gradibus assidere separatim ab aliis in theatro licebat , tam appositè , ac vehementer in aede Bellonae Tullius alloquutus fuit , ut eam statim sedaverit , immo etiam adduxerit , ut plausibus , festivisque clamoribus Othonem ipsum prosequeretur . Atque hoc tam insigne Ciceronis factum spectasse putatur Virgilius in similitudine , quam profert , gravis ejusdem viri , qui dicendi copiâ populi turbas compescit , ac dissipat : *Aeneid. Lib. I. v. 152. et seq.*

(4) Ligarium scilicet eo artificio , et eloquentiae vi apud

O ulinam ! tanti numquam praecepta magistri
Postera rejiciens aetas , nec adorta volatum ,
Neve novum tentasset iter : non copia fandi ,
Nec tantum ingenuae doluissent protinùs artes .
Haec ego , cum subitò cupientem dicere plura
Abrumpit socius : Nobis quid talia frustra
Nunc memoras ? veterisque refers quid temporis acta ?
O mage nostra , comes , nunc lamentabilis aetas !
Aspice , ut eloquii virtus , ut Palladis artes
Armorum strepitus inter , sonitusque tubarum ,
Inter damna , metus , turbas , incendia , caedes
Despectae jaceant , certamque ubi ponere sedem
Vix habeant : cuncta haec nostrum sic diruit aevum .
Ast ego : Tergeminâ redimitus tempora mitrà
Nonne PIVS ? qui nunc caelestis Janitor aulae ,
Romanaeque decus cathedrae jam promovet artes ,
Frontibus et doctis meritos largitur honores ;
Virtutis sanè custos , magnusque patronus .
Quid metuant artes ? tanto quid Principe Roma ?
Sol ruit interea : Quid statis ? surgite , frater
Inclamat : grato hîc nobis sermone licebit
Cras etiam vacuae solatia quaerere vitae .
Pergimus , et multâ jam nocte revertimur omnes
ARPINUM , patriaeque simul , tectoque subimus .

Caesarem Tullius defendit , ut Caesar ipse commotus , et clauso e manibus stilo , quo Ligarii poemam decernere constituerat , eum absolutum dimiserit .

PROSOPOGRAPHIA

Eorum , qui in corporis ornatu nimiae diligentiae student .

Tanta , tamque multiplex summorum virorum labore , curâ , industriâ ad rem litterariam universam accessio facta est , ut optimae quaeque artes , et disciplinae ad quamdam veluti maturitatem jam pervenisse , neque quidquam omnino in posterum timere posse videantur . Utinam tamen ita se res haberet ! At si quis cordatus paullulum modo circumspiciat , nonne tam mollem , et delicatam vitae rationem in dies inolescere perspiciet , quâ et mores in deterius ruant , atque unâ simul litterarum , atque optimarum artium studia , quae adhuc vigere visa sunt , penitus tandem jaceant necesse sit ? Quotus enim quisque nunc reperitur , cujus paene omnis industria vitae , et vigilandi labor in victu , cultuque corporis exprimi non videatur ? Sit lauta , et peregrina supellex , sint conquisitae epulae , sint arte elaboratae , et in dies novatae vestes , compositi ex more capilli , sint unguenta , sint odores . Viri nempe ipsi , iidemque constantis etiam , et ingravescentis aetatis vestiti , ornati ut concinnè ! ut molliter ! ut novè ! Inspice , quaeso , turrato , aut pyramidato pileo , farto , rigentique focali , unde pellucidus prominet lapil-

lus , arctâ , et refugâ veste , eâdemque ad pectus gossipio , vel stupâ turgente , muliebri sane thorace ad elegantem totius corporis incessum , demissitiis , sinuosisque femoralibus , ocreis micantibus , ferreisque clavis instructis , rideret utique Heraclitus ipse ; simul et tonso , cristatoque capillo , contractâ fronte , elato supercilio , pilosis genis , inflatis buccis , ore , mentoque composito , et nodoso dexteram subeunte bacillo , severos ut putes esse Catones , vel potiùs aenea incedere signa , quae pedibus obstrepunt , et varios spirant undique odores .

Quid porrò recentes isti urbani , quos , si audias , negotiosos sane homines , si verò penitiùs intuearis , in nihil agendo dixeris occupatos ? Num quis recens invectus mos ? num qua nova cultus ratio ? num quae solatia , joci ? De his totos disputant dies : haec vestigant , odorantur . Juvat et noctem ducere ludo , et in medios dormire dies , et ad sonitum citharae fiagi artubus , et motus etiam doceri Jonicos , possint ut traducere tempus , variare voluptatem . Atque haec omnia cum molliunt animos , tum etiam non levia valetudini incommoda pariunt , tametsi novae corporis curandi , medendique rationes in dies proferantur , rectè , an secùs , alii viderint , ego certe quidem nescio : hoc tamen scio , horum mentes cum tot distineantur nugis , minùs jam idoneas reperiri , quae optimarum artium , severiorumque disciplinarum commodis inserviant . Et certe quae nunc vulgo viget do-

ctinae cupiditas, nonne eo paene tota recidit, ut veteribus linguis aut omnino neglectis, aut primis vix labris degustatis, non ex fontibus, sed ex rivulis nescio quibus jejuna quaedam, et solivaga eruditio hauriatur, quâ non nostrates modo Aspasiae, sed viri quoque ipsi vel in conviviis, vel in circulis ingenium venditent, omni de re disputent, erudituli videantur?

Age jam, quid juvenus his orta parentibus? quid adolescentes ex tam molli disciplinâ producti, quae *nervos omnes*, clamat vel ipse Quintilianus, *et mentis, et corporis frangit*? Censes ne eos futuros, qui in bonarum artium, et reconditarum disciplinarum studia pro viribus incumbant; qui earum commoda proferant; qui eas summâ cum laude posteris tradant, quos cum videris, Charitum citiùs alumnos, quam Musarum putes cultores? Cave potius, tot deliciarum illecebris cum sint deliniti, ne haereat persaepe lateri letalis arundo, prorsus ut omne nefas de tenero meditentur ungui, quodque gravius, exemplo trahenti perniciem veniens in aevum, sint mox daturi progeniem vitiosorem.



Prosopographia haec desumpta ex oratione in studiorum instauratione habitâ in Collegio Romano XIX. Kal. Januariæ an. MDCCCIII., quâ Orator nimis mollem, ac delicatam vitae rationem bonis

artibus , et disciplinis planè exitiosam esse ostendit . Cum verò mos hic novetur in dies , vel potiùs horas , Orator idem , ut amico morem gereret , qui eam prelo committere cupiebat , demptis , quae progressu temporis jam obsoleverant ; ea indidit , quae vigeant an. MDCCCXXIV. , cum typis divulgata . Nunc verò haud ingratum Lectori fore putavit , si quae in oratione apposita , quaeque nunc pro tempore immutanda , addenda , hic subjiceret .

I. *In oratione* : Levibus ocreis , aculeatis calceis , pedemque urentibus , mento obvoluto , delicato sanè , ac muliebri incessu .

II. *Nunc verò* : Pilco elastico , qui , cum libeat , aliquantulum compressus speciem exhibet vel tertium lunae referentis ortum , vel lintris , pulsâ qui per vada pergit aquâ .

Duplici conspicio , atque etiam horologio , singulis vel catenulae metallica , vel serico lemnisco ex humeris transversum pendenti alligatis , et in interioris tunicae manticulâ repositis , ut Agamemnonem aliquo pacto imitari videantur , qui balteo ex utroque humero ante pectus decussato , altero quidem ense , altero verò clypeum gestabat .

Pilis tum in superiore labro , tum in menti gutture succrescentibus , ut Satyros potiùs , quam urbanos homines appelles ; tametsi mussitare audias , quod turpis sine frondibus arbor , turpis equus , nisi colla jubae fluitantia velent .

Linteis aestivo tempore ocreis , acutisque calcaribus , quasi illicò in Americam profecturi .

Sunt et qui urbe vagantes vel quid nugarum cantitent , vel ineptas lectitent chartas , saepiùs verò tortilis *tabaci* fumum haustum ore remittant , veluti totidem myrobrecharii , qui tamen non suavem , sed graveolentum spargunt undique odorem , vel saevam etiam exhalant ubique mephitim .

RISVM TENEATIS AMICI



FINIS.

I N D E X.

<i>EPISTOLA</i> nuncupatoria	pag. 3
<i>ORATIO</i> de <i>Maria Virgine in caelum evecta</i>	5
. de <i>die festo omnium Sanctorum</i>	11
. de <i>die natali sancti Joannis Baptistae</i>	16
<i>INSCRIPTIONES</i> in <i>funere PII VII. Pont. Max.</i>	21
. in <i>funere FERDINANDI I. utriusque Siciliae Regis.</i>	23
. in <i>funere MARIAE ALOISIAE BORBONIAE.</i>	26
<i>Ad ALOISIAM KAROLINAM BORBONIAM</i> e gravi morbo recreatam	28
<i>EPIGRAMMA</i> de viro <i>Emo JOANNE FRANCISCO FALZACAPPA</i>	29
<i>Ad ALOISIVM TOGNIVM</i>	30
<i>PROLUSIO</i> habita anno scholastico <i>MDCCXCVI.</i>	33
. habita anno scholastico <i>MDCCCI.</i>	36
. habita anno scholastico <i>MDCCCXV.</i>	38
<i>Prosopographia eorum, qui in corporis ornatu nimiae diligentiae student.</i>	41



NIHIL OBSTAT

Fr. Angelus Vincentius Modena Ord. Praed. in Romano Archigimnasio Professor Censor Theol.

IMPRIMATUR

Fr. Dominiucus Buttaoni Ord. Praed. S. P. A. M. Soc.

IMPRIMATUR

J. Della Porta Patriar. Constantinopolit. Vicesg.